

摘藻堂四庫全書薈要

集部

欽定四庫全書薈要

集部

御選元詩卷四十六



詳校官原任主事臣
李斯咏

欽定四庫全書薈要卷一萬八千四百五十八

集部

御選元詩卷四十六

七言律詩五

楊載

宗陽宮望月分韻得聲字

老君臺上涼如水坐看冰輪轉二更大地山河微有影
九天風露寂無聲蛟龍竝起承金榜鸞鳳雙飛載玉笙
不信弱流三萬里此身今夕到蓬瀛

次韻錢唐懷古四首

江湖清濁自天開，鴻鴈鳬鷺與往來。
黃道星辰環太乙，紫雲宮殿擁蓬萊。
論文競奏王褒頌，獻壽深傾阿母杯。
九域輿圖今混一，百年耆舊獨興哀。

斜界鉤陳通大道，中分魏闕對層巒。
雲生殿上金鑪暗，露下庭前玉井寒。
江漢飛龍俄宦宦，滄溟泛鷁竟漫漫。
中天會合寧非數，坐見蒼生奠枕安。

山回禁籞入雲長，無復陳兵衛兩廂。
千石金鐘埋野草，

萬年珠樹落秋霜
龍文不徙陽人聚
鳥篆終降軹道旁
九市塵埃來袞袞
一江波浪去茫茫

化人宮闕被層阿
棟宇高低若湧波
翠石文章書日月
寶珠光燄燭山河
空桑說法黃龍聽
貝葉繙經白馬駝
誰謂一無超衆有
只今塵土重來過

水樂洞

石林求路轉聳牙
來訪香巖大士家
雨過門前生薤葉
風行隴上落松花
懸崖滴水鳴金磬
激澗流泉走玉砂

欲適山林去城市久知寂寞勝紛華

題拱北樓

殷地鼓鼙迎日出倚天梁棟與雲浮北瞻帝闕三千里
南控臣藩二百州江海無波沈罔象旌旗垂野駐貔貅
鸞迴麗榜多深意繡袞於今有魏牟

次韻羅雲叔紅梅

玉人中酒殢芳華盡壓東風百種花
襖被冬深裁異錦
篝燈夜永障輕紗
纖麤露沁蜂腰蠟
密蕊雲蒸鶴頂砂

為問閬風何處在相期高舉籥晨霞

紀夢

海上垂綸有幾年平居何事夢朝天
蒼龍觀闕東風裏黃道星辰北斗邊
治世祇今逢五百前程如此隔三千
揚雄解奏甘泉賦應有聲名達帝前

望海

海門東望浩漫漫風颭無時縱惡湍
黑霧漲天陰氣盛滄波銜日曉光寒
豈無方士求靈藥亦有幽人把釣竿

搖蕩星槎如可馭別離塵土亦何難

留別京師

囊衣託載道旁車人事怱怱歲欲徂風雨四更雞亂叫
關河千里鴈相呼蕪菁散漫根猶美桑柘蕭條夜漸枯
却向高丘重回首五雲繚繞帝王都

簡浙東萬戶蕭伯善

擇帥中軍自古難獨分符節守藩翰夜鳴鼓角溪山靜
曉豎旌旗雨雪乾不待埽門知魏勃豈須彈鋏識馮驩

祇令四海無征戰萬卷詩書好厭觀

贈同院諸公

詔編國史有程期正是諸郎倬直時虎士守門宮杳杳
雞人傳箭漏遲遲窗間夜雨銷銀燭城上春雲壓綵旗
才大各稱天下選書成當繼古人為

玉堂夜直

直廬歲晏動羈情朔雪將飛覺夜明金井轆轤哀響絕
玉階瓊甍斷紋生鮮花莫辨沿牆迹松葉時聞委砌聲

媿以不才同制作諸公此日負高名

寄維揚賈侯

經國長才世豈多羣邪嫉正奈公何
氣蒸雲霧藏喬嶽聲轉滄溟放大河
遠迹江湖猶棄絕驚心歲月屢消磨
鵬鵬自有垂天翼肯逐飛鴻入網羅

寄康大夫

遙想幰帷出郭時先驅十里走旌旗
青山落日蒼茫暗白水秋風慘淡悲
勁矢每隨前隊發清笳偏逐後行吹

荊州未覺風流遠縱飲還應到習池

寄袁伯長

幾年簪筆侍明光直取才華補衛郎
祀事悉稽周典禮頌聲須假漢文章
雲垂迴野鳴鞘遠月滿高城下漏長
校獵合祛尤盛事願聞作賦擬長楊

東湖四景為大尹本齋王侯賦四首

朝來千騎出城闌為向東湖踏早春
素練罽林雲氣薄明珠穿草露華新
山花獻笑開簷畔海鳥忘機戲水濱

記取當年賢太守及時為樂與斯民

夏月湖中爽氣多南風疊疊捲長波漁人舟楫衝蘋藻
遊女衣裳擘芰荷膾切銀絲嘗美味腔傳金縷換新歌
使君用意仍深遠即此光華豈減磨

暫停麾蓋擁輕舟此日湖山屬暮秋采采黃花登几案
離離紅樹散汀洲傾壺浮蟻杯頻竭下箸鮮鱗網乍收
莫向錢塘誇往事白蘇未許擅風流

雲氣低藏十萬家東湖飛雪又交加玉禾舊布仙山種

瓊樹新開帝所花，別浦移舟聞過鴈。
高樓凭檻見歸鴉，侯門似有相如客。
賸賦篇章與世誇。

即事

禁城曉色清如水，高下樓臺錦繡中。
千樹好花連上苑，百壺美酒出深宮。
珍禽競集高林霧，寶馬爭嘶橫岸風。
人物此時俱盛極，兩都絕勝漢西東。

次韻伯長待制

揮鞭遠過御溝斜，出院時時見暮鴉。
已入玉堂同視草，

還趨瓊砌共觀花獸爐香繞窗前霧蠟炬光搖帳底霞
此去天津元不隔何須八月泛靈槎

送薛元卿歸龍虎山

金門詔下羽人歸欲向山中采蕨薇琥珀懸崖松樹老
琅玕倚澗竹根稀高簷蓄雨星辰濕古石懸雲逕路微
養性可無軒冕累遊塵元不浣仙衣

春雨

濛濛春雨暗重城莽若山林雲氣生駕過東朝霑羽蓋

仗移前殿濕霓旌蒼松密掩巖頭鶴翠柳深藏谷口鶯
明日不愁花爛漫新晴陌上有人行

寄吏部張尚書

復喜清朝用大賢玉音俄對黃庭宣姚崇已託君臣契
李泌終操將相權此日經綸須展布他時簡冊要流傳
淵明有待公田米可念江湖久棄捐

寄題成都萬竹軒為李仲淵作

君家種竹蜀江旁高與蠶崖勢頡頏已樹旌旗分部曲

更鳴琴瑟應宮商蛟龍併逐波濤化虎豹曾因霧雨藏
兄弟至今俱宦達未應開筵接求羊

送范德機

往歲從君直禁林相於道義最情深有愁併許詩頻和
已醉寧辭酒屢斟漏下秋宵何杳杳窗開晴晝自陰陰
當時話別雖慙遽祇使離憂攪客心

雷江阻風寄池陽通守周南翁

繫舟江岸隱蒲蘆坐聽篙師制疾徐巨浪駕空龍出沒

猛風吹樹鳥謹呼詩題短札難頻寄酒滿長餅已屢沽
輦道沙乾宜竝馬問君何日宦京都

再次韻張秋泉真人碧桃

一枝如玉照芳春幾度憑闌欲殢人翠被夜寒愁灑淚
珠簾月冷怕傷神劉郎陌上栽仍舊王母池邊賞又新
不是梨花飄雪樹望中清絕更無倫

寓長春道院春雨即事呈鄭尊師二首

南榮相距數尋間滿地春泥隔往還夜雨暗添籬脚水

曉雲濃掩樹頭山修篁夾徑宜增植細草侵階莫謾刪
世慮紛然無止極敢求大藥駐衰顏

客遊無賴阻重陰院落蕭條徑術深數畝林塘觀不厭
一窗風雨坐相侵靈虯尚有蟠泥迹老驥寧無越塊心
多謝西家賢太守相招樂飲費千金

題沈君湖山春曉圖詩卷

迤邐沙隄接畫橋東風楊柳暗長條鶯隨玉笛聲偏巧
馬受金羈氣益驕舞榭歌臺臨道路佛宮仙館入雲霄

西湖春色年年好底是詩翁歎寂寥

舟次池陽偕通守周南翁燕表姪陳和卿家席
上贈歌者

故人相見話綢繆三日江干繫客舟
高燕未闌明月上
豔歌初轉彩雲留
光搖崖蠟寧知夜
字寫邊鴻已報秋
底是尊前能盡醉
為伊肯展翠眉愁

贈惠山聖長老

道人卓錫向名山路絕巖頭未易攀
海上潮來風浩浩

洞中雲出雨潺潺松栢直起參天碧苔蘚旁行匝地斑
藉甚後人蒙法施有如流水注蒼灣

贈孫思順

天涯相遇兩相知對榻清談玉屑霏芳草謾隨愁共長
青春不與客同歸薰風池館蛙聲老落日簾櫳燕子飛
南浦他年重到日湖山應識謝元暉

送戴尊師入越

躍馬年年塞北遊春風此日送歸舟山中樹老飛元鶴

江上莎長卧白鷗欲與謝公同隱逸肯容賀老獨風流
山陰道士如相見沽取村醪醉未休

賦飛鴻送胡則大

年年客裏見飛鴻成陣成行上碧空杳杳江湖尋故侶
蕭蕭蘆葦下新叢翺翔已出雲霄上飲啄寧來沼沚中
今日似君歸去好扁舟一夜起東風

次韻蕭君用

崔嵬出水翠雲浮舁轎拖舟豈厭遊澶漫渠河方涉夏

蕭條竹樹已迎秋
銜杯興盡人先醉
舞劍歌長客易愁
八月江湖翻渤澥
長竿更約與君投

遣興

庭樹號蟬日已涼
寒雲橫鴈夜何長
挾書萬里干明主
仗劍三年別故鄉
西北諸山連朔漠
東南衆水隔荆揚
淹留不去慚蘇子
莫遣貂裘厭雪霜

湖上

秋郊縱步却驂驛
勝事能多許客參
如雪萬家收早稻

未霜千樹著黃柑
鼃鳴海上潮先湧
猿叫山前霧欲含
放浪漁樵元有處
使人猶愛住江南

偕汪侯宴舟中

中流畫鷁獨翱翔
暫勒鳴騶駐岸旁
風引錦帆衝野色
波隨蘭棹泛晴光
草涵宿潤珠璣滑
麥漲春雲餅餌香
何事乘槎之海上
問津從此達天潢

暮春遊西湖北山

愁耳偏工著雨聲
好懷長恐負山行
未辭花事駸駸盛

正喜湖光淡淡晴倦憇客猶勤訪寺幽棲吾欲厭歸城
綠疇桑麥盤櫻筍因憶離家恰歲更

吳山晚眺

山椒輦構四垂寬上相旌旗會覽觀傍近江湖天廣大
上連星斗地清寒龍宮永鎖函書閤鳳嶺重嗟苑樹殘
此際獨無雲蔽日正宜翹首望長安

遣興

門前高柳綠紛紛戀靄留煙晝不分雨砌芳菲晴後見

風窗言語靜中聞
桐花可作鳳凰食
竹葉還成虎豹文
但使此心無外慕
卜居何用絕人羣

夏夜對月

暑天煩倦唯酣寢
薄暮登樓起宿痾
簟報新秋涼意早
窗開永夜月明多
不眠孤鶴頻驚叫
好事流螢屢見過
安得泛舟江海上
坐觀冰鏡落滄波

范梈

送馬掾遷湖南

聞君暫與故交違去逐西風落葉飛看劍未成今夕會
拏舟定復幾時歸雲開帝子黃陵廟月過將軍赤壁磯
事業還須各努力收名即用繡為衣

送梁知事之婺州

皓月青雲若箇邊送行恨不共吳船新官浙下皆名郡
舊宅山東有賜田禮樂固應張盛代簿書勿用歎流年
經時不見曹員外今日因君重惘然

追和盧修撰張平章園亭觀花飲

白藕花邊香已秋
西郊風物野亭幽
未須短杖扶持病
且遣孤尊斷送愁
紫氣近連飛鳳闕
青山遙隔釣魚舟
勝遊縱在招要外
猶解因詩頌醉侯

秋日集詠奉和潘李二使君浦編修諸公

潘公牆角樹連庭
曾是笙簧晝夜聽
門巷祇今埋糞壤
輪蹄自昔走雷霆
長因午睡思茶竈
却為朝吟款竹扃
若續濟南名士錄
莫令憔悴鵲湖亭

李侯高朗若空晴
議論詩書滿腹撐
期接仙舟應少便

偶分宮硯亦多情蠻荒異俗中年歷河漢頻秋向夕傾
此去暫煩南郡守旌旄勿用野人驚

浦君高價本璠璣多幸蒹葭得所於學道初輕千里驥
收功直到九州魚詩探飯顆尤難測賦擬蘭陵定不虛
月月西垣更夜直還應共我惜居諸

秋入江山錦繡開白雲紅葉盡詩才句成底用三年得
槎在應須八月回自是每為浮客累非關不受故人催
憑將寄語詞林老風雨重陽又近來

將赴雷陽送羅提舉之任廣東

松滋暫泊薊門船，復指番禺路幾千。
茉莉香深和酒露，桄榔葉暗煮鹽煙。
齊人舊算無遺策，漢史新藏有賸錢。
莫為遐荒心力怠，珠崖更在海南邊。

題黃隱君秋江釣月圖

舊識先生隱者流，偶因圖畫想滄洲。
斷雲滿路碧窗晚，明月何年青嶂秋。
世故風塵雙短屐，生涯天地一扁舟。
何由白石空磯畔，招得人間萬戶侯。

寄上甘肅吳右丞

塞上孤鷹白雪毛
塞門風物靜蕭騷
黃河西去從天下
泰華東來拔地高
枸杞莫將如意改
醍醐足飲勝蒲萄
遙瞻圭袞還朝日
正屬江湖心緒勞

山齋

山齋朝雨竹光勻
茶竈催添石火新
對語黃鸝真不俗
飛來白鷺淨無鄰
辭榮豈敢要時論
賞靜猶應愧古人
報道林河春漲起
少須重理舊絲綸

傳之經歷謁告還湘中未語別而宵征翌日與
僚友追送生居亭中

美人歸思落滄波昨者論心肯重過寒盡極知春意在
夜深無奈月明何海隅雖暫違霜幕天上應須接玉珂
如此才賢移病去瘴煙端的為誰多

北風盡日破南溟行路經年倚壽星子自全家依翠岳
我猶萬里隔青冥山田鹿下投書去水館猿啼却坐聽
王事馳驅知有素何由重見此郵亭

十月九日詣天光門上進三朝實錄

儀鸞簇仗滿雲端玉鑰初開衆樂攢三后龍光周典冊
羣臣鵠立漢衣冠爐香著日浮晴靄宮樹班霜試曉寒
千騎前頭都不避祇傳學士拜金鑾

歸來

十載歸來問草堂入門喜見葛山蒼慈親已慰占烏鵲
穉子行堪詠鳳凰新理園池幾瓶物小移松柏且分行
卜居未是居難卜為恐旁人議楚狂

曾教授赴韶州

荔子紅邊五月初廣文去住定何如報恩豈戀將軍馬
治盜聊迂太守車多近藤蘿安吏舍少憑椒葛附音書
到官定有佳聲薦瘴雨蠻煙細袞除

靖海縣

海縣春深沙氣暄居人生事不離邨上梯取斧料桑尾
抽櫓移舟繫柳根已過清明違帝里不妨紅白徧江園
持杯試與酬風物深媿樊遲學圃言

百丈春日紀懷

東風久不到新堂生意雖微未卒荒草上葫蘆偏挺特
花間蘆葍故高長時來豈盡栽培力物化須知長養方
葵藿有心終莫奪每聞支笏照滄浪

寄題集賢周司直悠然閣

番陽東下萬山圍翹閣崢嶸面翠微雲接大荒迴古色
波涵落木動晴暉宦情靜與遊魚逝詩思長隨夕鳥飛
久待倚闌成獨酌癡兒了事各須歸

奉和王繼學懷濟南舊遊

前輩風流逐斷澌
濟南舊錄故人詩
遙知靈運初遊日
正是元方後載時
青社寥寥成異物
丹丘鼎鼎屬遐思
壯年易動離居感
繾綣花前金屈卮

樓上看山翠黛浮
樓前沽酒錦纏頭
登臨試與詢湖鴈
豪傑親曾侶海鷗
沙嶺曉晴雲散出
野亭春盡水交流
意中故舊那能得
強擬偷生賦遠遊

每愁大手不如燕
多見公侯勝昔年
計拙欲求千戶等

心勞政類十洲仙幾回見月思歸去暫到臨風復惘然
翦盡綠楊三萬樹多因無處著啼鵲

手接新詞絕底清一雙白眼為君青
寰區政待新年穀
江漢徒傳赤日萍斷雨潛蛟虛水榭遠波迴鷺實雲汀
此情可在齊州外不解無人問獨醒

上真應寺觀寺後龍湫湫在屋上蓋由寺北下
馬並高數十折得之又數步得巨石有僧龕其
中云即唐盧叟所隱成道處時日斜方焚香誦

經聞客至乃輟誦相迎作茶云

憑高窈窕辨精藍濯佩還思訪古潭字扁孟家題處碣
洞留盧叟去時龕近人野鳥如曾識問客山精不敢談
聞說平坡猶在上登臨雖倦且停驂

五月二十日發雷州過徐文次驛候役者不至
留二日

久約歸吳弄釣舟海天羈思復悠悠誰知樹底春生月
獨坐人間地盡頭粉壁舊題分薛讀瓦罌新酒接花箋

邊鴻固是南來絕絕為雷城信滯留

送元經歷赴廣東

番禺直北望長沙元帥持戈鎮海涯
萬里送君歸幕府幾時為我寄梅花
雲蒸巨浪魚吹岸柳壓荒山獠陣牙
欲托鄉書妨枉騎湄湘西上是吾家

蓮房

憶得花神一笑歡六郎家住小江干
佳人怨等秋風近穉子眠聽浦雨寒
強為折來開戶牖誰將鎔出擬杯盤

少年太守思兄弟戢戢青頭莫漫看

獨立

能詩不得靜中師又是天涯獨立時
高閣夕陽人影亂曲河新水棹聲遲
一身慷慨家仍遠十口淒涼歲薦饑
偶爾憑闌感風物臨流先被白鷗知

雨後坐郝大參亭子

每見人來問草堂偶從燕坐憶滄浪
地形遠競朝霞爽林氣清分宿雨香
移石旋成行藥徑障泉思引釣魚航

他年紫綬歸黃閣
几杖苔生儘不妨

揭傒斯

夢武昌

黃鶴樓前鸚鵡洲
夢中渾似昔時遊
蒼山斜入三湘路
落日平鋪七澤流
鼓角沈雄遙動地
帆檣高下亂維舟
故人雖在多分散
獨向南池看白鷗

宿梁安峽夢故室有感時還盱江

梁安峽裏杜鵑啼
絕壁蒼蒼北斗低
雲氣倒連山影合

石稜斜鬪浪聲齊南風盡日迎歸客落月空江夢故妻
一室十人分數郡百年幾處候晨雞

送道士薛元卿歸江東

知君此去漸難招只在人間已廓寥市上有時逢賣藥
山頭何處覓吹簫仙巖花落溪流滿鬼谷雲開對影遙
未必故山安隱逸海天涼月夜蕭蕭

小孤山曉發和蔡思敬韻

日落霞明錦浪翻厓傾石峭白雲間乾坤上下雄孤柱

巴蜀東南壯此關神物夜移風動地仙舟曉渡月漫山
回瞻絕頂登臨處空翠溟濛杳靄間

送蔡思敬還豫章有懷遼陽李提舉

來日能同去不同獨攜別恨向秋風眼看亂葉渾無定
心與浮雲并一空黃獨山中歸自斲玉梅溪上夢先通
莫嗤留滯京華者更有遼陽送斷鴻

送王留守宣慰荊湖

舟楫連檣出薊邱弓刀千騎入荊州歌翻郢雪寒暄變

恩逐岷波日夜流
雲雨暝連神女宅
山川晴繞仲宣樓
豈無賢士堪招隱
應向鹿門深處求

送詹尊師歸廬山

香鑪峯色紫生煙
一入京華路杳然
雲碓秋閒春藥水
雨犁春卧種芝田
書憑海鶴來時寄
劒自潭蛟去後懸
忽報歸期驚倦客
獨淹微祿負中年

進士張于高得邛州判官歸成都

邛竹山前負弩迎
去年曾是一書生
天寒劒閣猶車馬

雪滿繩橋正甲兵，即恐徵求民力竭。
莫將憂患客心并，六千餘里關河路不盡。
深期遠別情。

送毛真人還龍虎山

手綰銀章主秘祠，翩然歸去忽如遺。
塵湖龍井雲間上，鳳曲鸞歌月下歛。
香逐薜薇深更入，氣交梨棗靜偏宜。
南屏風雨平坡雪，爭似山中夢覺時。

南屏山在上都南七十里，歲危從至。

上都夏秋居焉，平坡在大都西四十里西山上，冬春居焉，蓋皆所掌秘祠所在。

寄題信州德元觀何真人林園長春亭

長春亭榭倚雲開，百里湖山入座來。
流水繞階時自照，好花如幄手親栽。
青雲每指尋真路，白髮頻登望母臺。
六月神龍起潭井，人間幾處待風雷。

送聶太祝赴潮州錄事聶天厯潛邸舊人

三載從容禮樂間，糾曹新拜度梅關。
春風忍過金陵道，夜月重經黃木灣。
盜賊數州相應起，甲兵諸道幾時還。
憑君細講安民策，莫遣邊防一日閒。

憶昨

天歷年中秘閣開授經新拜育羣材宮門待漏嘗先到
講席收書每後回召試時蒙天語勞分題不待侍臣催
滿頭白雪丹心在太液池邊只獨來

宮草蔥茸禁樹齊日趨延顙對凝暉朝迎步輦花間立
暮送回鑾柳下歸碧殿東浮蒼巘合金河北引玉泉肥
幾回弘慶門前路春氣濛濛欲溼衣

己巳羣儒映辟奎端陽侍燕寶慈西線分學士親臣送
詩賜皇姑御手題注酒含春瑤露重承塵轉午錦雲低

日斜共出西門道既醉猶能散馬蹄

和張太一秋興

蓬萊宮闕赤回闌龍虎神君禹步寬朝嚙日華當食穀
夜迎天仗識鳴鑾露飛仙掌金莖凍月滿元都玉佩寒
遙想西齋清似水吟詩聽到漏聲殘

送張真人歸上清

閉戶京城晝嬾開初聞北覲却南回馮夷擊鼓乘龍出
王子吹笙跨鶴來囊裏天書明日月匣中神劒閃風雷

回瞻魏闕紅雲擁應在山中看蚤梅

楚山秋晚

山人何處抱琴歸遙想樓臺隔翠微老樹風生舟正泊
空江日落鴈初飛豈無賦客能招隱亦有漁翁醉息機
一幅秋光舒復卷誰教塵土浣人衣

黃潛

鳳凰山

滄海桑田事渺茫行逢遺老色淒涼為言故國遊麋鹿

漫指空山號鳳凰
春盡綠莎迷輦道
雨多蒼蘚上官牆
遙知汴水東流畔
更有平蕪與夕陽

開元宮

誰使藏舟一夕移
紅樓翠幕未全非
曾聞帝子乘鸞去
疑有仙人化鶴歸
煙迳月明瑤草歇
石壇露冷碧桃稀
赤欄橋畔多時立
閒看楊花作雪飛

早起

漠漠晴檐散薄雲
獨搔短髮立清晨
春風入樹無行迹

曉月窺簾欲近人
旋覺新吟隨夢寐
不知清露溼衣巾
何人正踏長安陌
想見看花拂面塵

獨立

數盡飛花一愴然
壯心迢遞夕雲邊
十年人事空流水
二月風光已杜鵑
過眼青春寧復得
汙人黃土絕堪憐
故園尚有平生約
可使蒼苔到石田

即事

南陌東阡草色齊
惓惓門巷客來稀
受風燕子輕相逐

著雨楊花溼更飛綠樹無言春更盡紅塵如霧手頻揮
浮生莽莽吾何計獨立看雲竟落暉

予與劉君師魯為文字交十有四年而未嘗相
識也茲過武林偶遂良覲有喜而賦

邂逅神交十載餘青楓落月幾愁予何言此日同傾蓋
勝讀平生未見書天上玉堂容可到山中金匱得長虛
故多餘事宜商略可待秋風怨索居

次韻山南先生遣興

稍覺春風入翦裁更無魂夢到塵埃苔枝自送黃昏影
寶篆頻銷白晝灰世態漸應隨日別老懷可復向人開
擁鑪坐聽蕭蕭雪載酒攜琴也莫來

寄朱仲山

異縣關心朔鴈飛酒燈暮雨計頻違寄書全覺嵇康懶
入夢多疑李白非黃葉閉門方寂寂碧雲回首故依依
相逢賴有梅花約試蹋東風走翠微

夏日漫書

枕上初殘柏子香
烏聲簾外已斜陽
碧山過雨晴逾好
綠樹無風晚自涼
芳歲背人成荏苒
好詩和夢落蒼茫
求羊何不來三徑
門掩殘書滿石牀

逢葉伯幾

水煙沙雨送歸航
楓葉蘆花已十霜
瑤曲天風春夢遠
墨池秋草故遊荒
碧峰又是新迴鴈
白石依然舊化羊
一笑相逢却成別
暮雲千里思茫茫

宿賈氏山房

暝色蒼茫赴遠岑，獨追燈火下荒潯。
寒沙細水通幽徑，修竹高楠走翠陰。
草草悲歡中夜語，悠悠醉醒百年心。
石霜煙月寒無寐，坐聽疎鐘出二林。

送人歸豫章

已覺棲遲懶曳裾，可能為我強躊躇。
一帆秋色紅塵外，千里江關白鴈初。
建業水清誰共飲，潯陽潮斷定無書。
黃金未盡朱顏在，莫種桃花學隱居。

送韶父先生遊京口

不到南徐三十春
好將夢寐弔遺民
也知往事如流水
祇想重來是後身
棹響官河風色暮
雲離野服鬢毛新
舊遊偶失扶桑路
煩向滄江一問津

寄張如心

謬羨侏儒飽一囊
舊遊搔首獨淒涼
連天斷鴈初沈日
匝地寒花欲有霜
聞道為郎須白髮
未殊高枕待黃梁
紅顏好在張公子
坐聽松風春晝長

佘山

春雲牢落鴈無聲沙岸參差石有稜
雙屐漫窮芳草徑
一龕長魄白頭僧
晴濤閃閃翻孤日
山木昏昏卷翠藤
後夜清風滿遙念夢游空指上方燈

客樓雨中

江城飄泊動經年
盡日高樓閱過船
睡起小窗初聽雨
岸傍垂柳已生煙
坐拋歲月今如此
每望雲山欲泫然
尚喜遊從得諸彥
時將樂事寄新篇

登金山

偶為清游宿梵宮凌晨試上最高峯
水翻雪色寒猶落雲掩丹光遠更
重舊有一僧能跨虎近聞三洞盡
藏龍下方車馬應難到煙際唯聽
日暮鐘

題甯節婦詩卷

春旗柳色映門閭華扁新題節婦
居作傳小裁青竹簡疎封近降紫
泥書河壩松柏風煙外階祀芝蘭
雨露初三釜及親殊未晚花前何
日奉安輿

送楊廉夫之天台

十載韜藏席上珍爛然錦製一時新羽人笑指雲為路
山鬼愁聞筆有神遙望到官多暇日不妨領客試行春
石橋瀑布逢佳句取次飛箋莫厭頻

龍潭山

二月清江照眼明避風舟楫滿迴汀斷雲挾雨時時黑
密葉藏花樹樹青習隱未成陶令賦行歌聊共屈原醒
碧潭光景無消息坐看魚兒點翠萍

次韻方子踐觀潮

潮生潮落有時休朝暮吳兒幾白頭被髮祇誇迎駭浪
側身寧解障奔流江吹碧瓦人聲曉雲閃朱旗海氣秋
後夜月明天在水有誰能此試登樓

次韻答蔣春卿

不謂紅塵拂面時軒然談笑一舒眉晴風石鼎浮花乳
夜雨春盤冷碧絲握手遽成三宿戀論心那覺十年遲
酒船漁網歸無計未必山前白鷺知

重遊毗山

十載重來思惘然勝遊邂逅一開顏
高林有色煙雲淨曲徑無香草樹間
漫遣金樽催白日絕憐紅粉浣青山
南朝舊迹今誰記腸斷風流不可攀

花信

已覺尋芳去較遲千林紅紫總紛披
幾經夜雨能無恙試問春風竟不知
斜日游蜂應有夢野亭立馬已多時
殷勤却是江南客曾擘冰霜寄一枝

北山歸路呈古心師兼簡方外諸友

尋幽偶向靈源宿却過雲關望翠微
初日映空千樹立驚風繞澗百泉飛
舊題歲月人頻異乍別煙霞路易非
幸有潘郎遺事在何時一鉢去如歸

陳山晚泊

一柱孤撐杳靄間人言此是客星山
風流百世今誰嗣應詔諸生故未還
荒塚草深迂石路高齋月滿悶松關
窮年漫跡滄江上及此維舟獨厚顏

湖心寺夜坐

蕭蕭涼月滿池臺
水檻風櫺四面開
一炷殘燈何煜煜
半檐衰柳故崔嵬
謬持微祿知無補
未謝餘緣得重來
塵土馬蹄何日事
可容良夜廢銜杯

題金明宴遊圖

危樓縹緲碧波中
曲檻方櫺面面通
雲氣傍花如欲雨
柳絲垂地不驚風
千年華表人非是
九奏鈞天樂未終
更有殘山并賸水
煩君回首六橋東

上巖寺訪一公

曉色微茫尚帶星
修蹊犖确斷人行
獨支瘦竹身猶健
高入重雲地忽平
落月正當山缺處
細泉頻作雨來聲
上方燈火青林曲
隱隱疎鐘一再鳴

題觀海圖

昔年解纜岑江上
初日團團水底紅
鼉吼忽搖千尺浪
鷗飛仍挾半帆風
遙看島嶼如星散
祇謂神仙有路通
及此棲身萬人海
舊游却在畫圖中

送葉仲輿巡檢

重著儒冠望帝鄉
翩然一舸犯晨霜
秋來鬢髮依前黑
日射河流徹底黃
此去乘槎須有路
可容執戟更為郎
絲綸閣下多知己
握手應分滿袖香

送趙繼清潮州推官

相國南遷有故居
理官高選出新除
承恩特與金魚袋
訪舊爭迎駟馬車
春入園扉庭草暗
天低驛路嶺梅疎
鳳池不隔同年面
歸及梅花鴈影初

送龍南歐陽縣尹

絲綸閣下半同袍，獨上南船去莫招。
出宰不嫌官俸薄，過家未覺驛程遙。
長溪白石晴雷轉，深洞黃茅毒霧消。
想見行春有佳句，坐令遠俗變風謠。

贈黃資深

涼風蕭蕭吹敝裘，三年小作周南留。
相逢傾蓋盡青眼，肯抱遺經空白頭。
捧檄定知毛義喜，著書非有虞卿愁。
春秋決事待公等，莫戀寒氈成久游。

送陳季和

高齋燈火正蕭條
忽溯天風上泐寥
共喜彈冠如貢禹
豈期投筆學班超
時清桴鼓元無用
歲晚弓旌儻見招
雪後江南春水活
重來莫厭驛程遙

送張良卿學士之淮南

坐厭流塵拂面紅
行攜涼月下青空
三千里外揚州鶴
四十年前御史驄
先廟鐵衣猶挂壁
兒郎玉帳已生風
貞元朝士今無幾
歸及花時一笑同

題莫氏山莊圖

旋移小隱傍南峯遠有咸平處士風山態近人猶偃蹇
湖光無雨亦空濛行春杖屨時時到臨水軒窗面面通
別作新亭供戲劇青帘遙曳杏花中

予與江陰何鼎叔鉉別三十六年乃相見於錢
唐感舊述情謾成四韻

月寒霜樹久相依春去風花各自飛遠信已隨潮水斷
故交渾若曉星稀綈袍可戀知誰在青鏡頻看歎昨非
正欲從君共傾倒莫言興盡便須歸

送內史府孫知事還京

春風朱邸雪初消
野宿貔貅靜不驕
綠水芙蓉分上幕
青雲騷褭度輕輶
龍庭會祭包茅貢
豹尾宸居佩玉朝
下土微臣今老矣
淹留敢望小山招

感舊

華屋山邱不可期
峴峿依舊綠參差
空懷下榻延徐孺
無復乘舟訪戴逵
日暮更聞鄰舍笛
歲寒賴有角弓詩
舊遊寂寞成今古
冷石秋花處處悲

柳貫

奉同伯庸應奉韻送伯生博士行祠西嶽因入
蜀望祭河源

旌旗前隊一星低
燎玉熏薌嶽色齊
石戴殘雲開半面
棧懸斜日落鄣泥
曾聞秘祝藏金虎
復道祠臣致碧雞
聖代新儀將考貢
崑河只在太荒西

馬首西南太白開
祠庭佳氣拂崔嵬
河邊織女機絲出
霧裏仙人翠蓋來
鳥道山盤燒後棧
龍池塹黑劫前灰

少城萬里層雲色遙送清秋使節回

次韻伯庸無題

貝葉東來不隔江青瑤刻作寶華幢
龍翰別致三千匹翠羽生翰四十雙
天上神閒雷下斧人間客醉月縈窗
崧南半截雲虹色宜著韓家小石淙

珠斗闌干動夜光霏霏神雨酒痕香
故時徒服多為赭今日祠衣獨尚黃
梁苑且延能賦客漢廷安用戲車郎
琴中莫置拘幽恨聖德宣昭到越裳

欲覓麻姑看海潮
徑從織女問河橋
著莖宿露龜方息
竹實垂雲鳳已遙
白璧何資三寸舌
黃金偏戀十圍腰
新來代地聞歌曲
盡擬秦聲入管簫

黃鵠將騫兩翅垂
跂行幾許似蛇醫
棲遲社首修封日
太息甘泉獻賦時
風籟蕭蕭聽漸起
星弧歷歷看初移
塵埃渴肺今年甚
絕想仙盤露一卮

送李士弘侍讀攝祠王屋

河山肺腑樹靈峯
泰乙高居象帝容
蒼玉登壇親藻藉

黃金塗檢盛函封林光忽與升煙合雲氣初乘委珮重
歸格神休奉明主恩流偏覺侍臣濃

還次桓州

塞雨初乾草未霜穹廬秋色滿沙場割鮮俎上薦黃鼠
獻獲腰間懸白狼別部烏桓知幾族他山稽落是何方
長雲西北天如水想見旌旗瀚海光

次伯長待制韻送王繼學修撰馬伯庸應奉扈
從上京

仗前捫酒進瓊脂翠絡金鉤向馬垂
少宰氈廬初張事
從官魚笏正書思
三辰上應旂
存象六樂中陳鼓
吹詞
供奉逍遙承御宿
故應燕許擅同時

山圍黑谷翠漫漫
獨許詞臣息馬看
蹕道雲開朝采正
蹕林風定雪花乾
賦成特賜麒麟罰
宴出初擎碼碯盤
歲歲八州人望幸
鉤陳旗尾認朱竿

漫題齋壁

牧馬新來秣地椒
街頭捫酒玉傾瓢
羲和白日經天近

敕勒陰山度幕遙雨過忽然思御袂風清聊復快凌歊
他年續作灤陽夢萬里排雲遡沱寥

送王正臣經歷赴浙東

仙掌浮空紫翠重金華秀出浙河東繡衣幕府雲霄上
丹筆刑書雨露中溪釀獨稱雙醞美津船纔許一帆通
送君因寄思鄉夢為問青山舊桂叢

送楊君祥赴定海稅官因思舊遊

麾手黃塵一解頤翩翩行色有光輝豚魚稅足初成算

鷗鳥心閒已息機
山翠入簾消宿酒
海氛吹雨落秋衣
舊遊更在雲濤外
獨倚西風送鴈飛

送陳仲剛歸鄱陽卻赴武昌謁選

黃塵如海漲天衢
好在歸來一束書
捩柁纔看彭蠡近
食魚真愛武昌居
莫因蘭葉思紉佩
想對梅花夢直廬
治世有音當合雅
勞歌毋踏楚聲餘

送葉道士歸天台

北斗光中曳翠旗
五城樓觀極巍巍
采山不鑄黃金鼎

佩印空垂白羽衣石井劒花飛夜氣玉田芝草豔春暉
天台仙子應招隱萬壑梯飈看鶴歸

次韻伯庸待制上京寓直書事四首因以為寄
舉頭涼影動明河問信仙人八月槎斗下孤光懸太白
雲間長御挾纖阿霓裳催按新聲遍鳳藻需承曲宴多
一代詞華歸篆刻龍文還欲映琬戈

松翠新裁似鶴翎手中雲影落深青宮花忽動紅千帳
禁柳齊分綠半樨金掌擎秋調玉屑銅渾窺夜約銀釘

不知太史朝來奏東壁光聯第幾星

烏桓落日稍沈西南極青山女堞低馬谷夏泉經雨漲
龍堆秋草拂雲齊一函祠檢將升玉萬里九封不用泥
瀑直夜涼談往事乘車猶欲避雞棲

杯面春風濫濫波醉來難覓百東坡寧無天上支機石
信有人間采玉河霜驛舊圖開党項雪毫新興寫伽陀
聚星更比荀陳盛月照金鑾夜若何

送鄉僧偉師南還

析木光中佛耀開丹樓碧閣映崔嵬空聞白馬馱經去
幾見黃龍聽法來笠影翩翩翻雲作蓋錫痕依約浪生苔
歸山說似京華夢親到幽州禮塔回

舟中睡起

影入船窗隙日升霜衾驚夢却青綾一官朝右寧非客
十月漳濱幸未冰江驛比來無鴈帛水鄉隨處有魚罾
食貧龜勉紫微祿消得山靈笑負丞

登徐州城上黃樓北望河流作

高樓背水壓奔衝影動雲虹落水中土色從黃宜制勝
河聲觸險聽分洪却思沈麈千年日欲問乘槎八月風
汴泗交流平似席南行北播本同功

過鐵峰書臺觀其所得宋咸淳中大宗正訓名牒上有福園署押感而為賦

姬姜顛顚況同盟屬籍淒涼舊訓名寶玦懸腰非少日
金環探樹是前生分無藜杖過天祿尚有花書記冢卿
未必後來能識此祇教人說漢西京

初夏憶京城鄰舍

石家院裏葡萄酒，荆媪池邊芍藥廳。
倦劇擁書終日坐，醉來支枕片時醒。
主人並直飛龍衛，鄰客誰開放鶴亭。
萬里滄江雲一去，欲將孤影寄伶仃。

送張明德使君赴南恩州

幾許炎州畫裏山，西風驅向馬前看。
詩人舊志三刀喜，邊候新乘一障安。
時取椰漿斟玉液，饒將桂蠹薦雕盤。
雪花定比常年大，燕寢香凝夜氣寒。

追餞常大參至樵舍鎮飲別後夜宿舟中聽雨
七十里江沙水黃沿流送客舉離觴回舟并載別愁重
殘雨微生半夜涼欲與仙人騎竹杖時從老子據胡牀
懸情獨有南樓月白兔河邊正擣霜

水際見早梅

苦為江梅欠好歌更愁琢句損天和少留枯槓何妨醜
添著疎花果厭多折得故分春色在吹殘將奈角聲何
情知不是塵中物月地雲堦合重過

斬新花發看垂垂作意東皇許探支見慣誰將欺朔雪
放遲吾自惜南枝小橋流水香微度澹月清霜影亂隨
頭白逢春狂未減興來落筆又成詩

端午日泊舟信州城下陳行之推官袁仲野知
事攜酒饌勞予于挹翠亭上

信州城南江水流故人惜別暫維舟節中偶病不成飲
客裏逢歡却是愁地近那容胡旋舞波回更作楚聲謳
三年三見戎葵色多事紅花照白頭

浦陽十詠

仙華巖雪

縣北有仙華巖翠掌浮空雪景尤奇

冰柱浮空曉色蒙
海波搖動玉玲瓏
九清內景游紛外
五嶽真形太素中
微月升壇初映鶴
長雲連野不驚鴻
仙姬宴坐瑤池上
催捧蟠桃獻木公

白石湫雲

白石龍湫在縣東南能出雲為雨

白石靈山望贊皇
湫潭此復見蒼蒼
飄揚直欲陵三際
膚寸猶能雨八荒
空外金精縣太白
泉中虬彩化長黃

傳芭秦罷神絃曲松蓋成陰澤氣涼

恒州贊皇縣有白石靈山漢碑在焉

龍峰孤塢

縣東龍峰古塢定為蒼龍左角

兩環日月似飛梭
鰲背稜稜窄堵波
朱鳥前頭森巖巖
蒼龍左角見嵯峨
玉函舍利朝光現
珠斗闌干午影過
浩劫浮雲開萬象
寶華雜遝散芬陀

寶掌冷泉

寶掌山唐千歲和尚道場有看經得道洞巖竇出泉極甘寒

一勺曹谿未是甘
刺山容易出飛泉
消融太古岷峨雪
澄映中秋沆瀣天
挂樹青猿窺洗鉢
眠沙白鹿伴安禪

巖龕無縫身如石逆數高僧入定年

月泉春誦

縣西有泉隨月盈虧泉上精舍祠文公成公

有盈有泚即寒泉猶隔蘆峰道里千嶽麓雲深藏策處
匡山人老讀書年松楠疊影青浮几華樹生香晚入筵
稽首堂中兩夫子六經言遠視如天

潮溪夜漁

去縣五十里溪流始大有魚蟹之產

溪水添流到石砭小家殘戶占漁商蛟龍未解乘雲氣
魚鼈安能避澤梁兩岸櫟林藏曲折一篝松火照微茫

淮夷固有蠙珠顆往往鉤深得夜光

南江夕照

南江橋西望原麓
返照如畫圖中

千峰不盡夕陽孤
歛翠浮丹入畫圖
埵廟傍連山影直
石梁中亘水痕枯
白魚在汕將踰尺
紅稻登場稍似珠
玉露金風秋最爽
跳身何用市間壺

東嶺秋陰

縣東東山嶺平林
廣野秋常多陰

半里官橋出市闌
一團秋色破孱顏
雲開浩蕩初疑曙
日出蒼涼不見山
斷鴈殘鴻飛杳杳
綠蕪紅葉映斑斑

去年菊蕊今年發拾得籬邊句子還

深禡江源

浦陽江原出深禡山在縣西三十里

濫觴初不滿餅盆百谷渾渾一壑吞自此安流輸渤澥
放渠高浪蹴崑崙出山未適帆檣便竭澤毋庸罔罟繁
謝客題詩曾宿處孤雲落日是何邨

昭靈仙迹

昔黃帝少女于仙華巖上升山下有昭靈廟水旱禱之輒應

芝掌中開顥氣青雲駟雙駕鳳凰翎因山不啟軒轅鼎
化石猶聯婺女星磴道芳春琪樹長巖扉清晝碧華零

真仙帝遣司風雨喚起淵龍聽指令

垂虹亭晚眺

山光自獻一螺青人立垂虹酒乍醒
兩界星河涵倒影千家樓閣載浮萍
欹檣側柁衝風勁密網疎罾刮浪腥
正為鱸魚忘世味隨方吾亦具苓箬

夜行溪谷間梅花迎路香影離離可愛

暝投邗徑繞羊腸離立江梅似鴈行
冷蕊微開初的皪繁枝亂插更淒涼
蒼煙挂樹多疑夢淡月窺林稍覺香

正為先生行役苦故留陂玉薦奚囊

中秋待月不見却懷魯子翬學士時留城

婺女城頭柝亂鳴二更起坐聽江聲為渠滿月當圓景
奈此浮雲點太清蓬鬢羞明寒燼落桂花養魄嫩寒生
去年官燭風簾夜對酒人今在玉京

寒食山居


歲月無情日變遷惜春留得酒家錢梨花小雨驚寒食
楊柳東風似去年志士屬當躬井臼善人誰為表原田

老來撫節偏多感何必雲安有杜鵑

初霽望金華山雪

亘陰巖谷變晶熒凍裂仙家月石屏雲影渾淪涵太素
光搖曳到空青波心雙捧金人劍霞際橫驅玉女輶
鶴不來詩夢破鮮飈吹袂酒初醒

御選元詩卷四十六



總校官庶吉士臣侍朝

校對官檢討臣蕭九成

謄錄監生臣朱文佐

欽定四庫全書薈要

集部

御選元詩卷四十七



詳校官原任主事

臣李斯咏

欽定四庫全書薈要卷一萬八千四百五十九

集部

御選元詩卷四十七

七言律詩六

吳萊

次韻柳博士五洩山紀遊

日曉行呼野鶴羣
山溪五級洗巖氛
虹霓射壁從空現
霹靂搜潭到地聞
桑苧茶鐺遺凍雪
偃佺藥杵落晴雲
飄然早已同仙術
老我曾探嶽瀆文

一點剛風削玉蓉仙山肺腑悶重重眼穿上界成官府
古卷西江得祖宗鷺嶺雞峰渾未到龍湫鴈蕩豈多逢
年來卧病吾環堵負却詩家九節筇

浦陽十景

錄四首

仙華巖雪

手倚晨扃一渺漫山神擁出玉巔峴光侵道者祠星室
跡破樵家斲藥壇石筍撐空穿宿暝天機織素挂餘寒
俄然喚醒西南夢怕作松州徼外看

湖溪夜漁

昨夜寒潮與此通
荒溪尚趁百川東
行依柏樹林頭月
釣拂蘆花嶼畔風
插竹侵沙魚戾短
篝燈映草蟹碕空
太公遠矣吾將隱
赤鯉何書在腹中

南江夕照

偶出官橋倚落曛
詩家觸景謾紛紛
彈琴在峽驚聞瀑
罨畫為溪喜得雲
竹篠晚深樵弛擔
莎根秋短牧歸羣
道旁更有枌榆社
欲脫蓑衣藉酒醺

東嶺秋陰

幾點晴雲著樹梢
寒山蒼莽類城壕
雞豚日落聲相接
鶴鶴風涼勢自高
小徑殘榛分嶺脊
平疇淨綠帶溪毛
朝來雨足多秋意
井上無人事桔槔

寄喻國輔張宜之

手挾殘編只蠹塵
山林著我最間身
槁梧可據瞑須熟
華黍雖亡補欲真
危坐但看燈作暈
遠遊還覺劒生鱗
相思正是多風雨
滄海無涯可問津

柳博士自太常出提舉江西儒學來訪宿山中
一掃空山鹿豕蹤車如流水馬如龍黃魔法仗知宸輦
青史勲名問景鐘宣室受釐端有召曲臺傳禮尚為容
少年作賦將投獻東北孤雲是岱宗

尚有歐曾舊典刑森然人物照青冥身從北闕攀燕桂
夢歷西江食楚萍萬里羈袍春值雪千秋龍劍夜占星
此身恨不輕簷笈的的根源在一經

吳師道

寄友

聚散悠悠水上萍相思千里夢魂驚
門扃白日閒花落愁入春風芳草生
天北雲遙回鴈影江南春盡老鶻聲
飄零王粲今何處想見登樓此日情

赤壁圖

沈沙戟折怒濤秋殘壘蒼蒼戰鬪休
風火千年消伯氣江山一幅挂清愁
丈夫不學曹孟德生子當如孫仲謀
機會難逢形勝在狂歌弔古謾悠悠

溪亭夜宿

閒亭來伴野雲棲
剪剪東風冷客衣
孤鶴有聲溪上啄
落花無影月中飛
愁銷綠髮三春過
夢拂青山半夜歸
混迹漁樵莫惆悵
得時奴隸總輕肥

野中暮歸有懷

野田蕭瑟草蟲吟
墟落人稀慘欲陰
白水西風羣鴈急
青林暮雨一燈深
年豐稍變飢人色
秋老誰憐倦客心
酒禁未開詩侶散
菊花時節自登臨

和黃晉卿客杭見寄

書問蕭條已半年知君近買過湖船
江花日暮吹紅雪
店樹春晴起綠煙
客裏光陰遽如許
人間岐路正茫然
離羣得似從遊樂
紙貴錢塘日萬篇

次方韶父韻

婺女城頭掩半扉
沈侯樓上鎖斜暉
聽鴻前度同遊盡
化鶴重來萬事非
山水娛人真不惡
文章驚世故多違
如何有酒身長健
竟月登臨莫便歸

送許益之之金陵赴趙侍御招

揚帆千里載書琴
此事光華喜見今
青眼憐才真有道
白雲出岫本無心
校書燈火西齋靜
聽講衣冠北府深
歲晚幽期良自保
孤根未恨遠穹林

和羊希曾憲史韻

高步青霄計未差
征途祇暫走塵沙
煙波江上吟芳草
風雨城東看落花
攬轡欲追千載士
扣門肯向五侯家
遙知齋閣清無事
滿架殘書整復斜

中秋次同院人韻

鳴騶雜遝款庭中宴罷扶攜看醉翁
禁鑰鎖深秋院月天香吹濕露華風
終宵倚樹憐吳質何處登樓覓庾公
挹取清光照方寸此時分散莫怱怱

山行即事

穿雲渡水百盤迴身在青紅錦繡堆
野老怪人衝雨過牧兒疑我看花來
山林自足平生志州縣原非健吏才
但得翳桑無餓者不妨歸卧守蒿萊

次韻張仲舉助教上京即事

海波填碧湧金黿當日經營得俊髦周鼎卜年開帝業
漢都作鎮奠神臯宮中雙鳳朝扶輦帳下千牛夜捉刀
萬國會同時肆覲衆星遙拱北辰高

大駕時巡鎮北庭皇風萬里暢威靈有年太史仍書雨
卜日祠官已祭星白草黃雲秋漫漫朱樓翠樹晚冥冥
南歸却作灤陽夢應是平生舊所經

翼翼行都歲幸臨名王諸部集如林羶車滿載彤庭帛

寶馬高馱內府金暮散歌呼灤水上夜騰光氣黑山陰
世皇謨略真宏遠共感湛恩到骨深

聞危太朴王叔善除宣文閣檢討

陰山分脈自崑崙朔漠縣延迴北門遙見馬駝知牧地
時逢水草似漁村穹廬勅勒秋風曲青塚嬋娟夜月魂
今日八荒同一宇向來邊徼不須論

兩都賦意入經營今日奇逢有此行弟子絃歌臨璧水
諸公篇翰出承明眼中高闕祥雲色夢裏空齋舊雨聲

千里相望勞問訊
追扳無路若為情

亭障連山入杳茫
羶車如雪謾沙場
鵬盤天際秋雲白
鴈去關南木葉黃
獨客應憐冠戴楚
閒情無奈管吹羌
歸來若度桑乾水
莫忘并州是故鄉

至大庚戌黃君晉卿客杭與鄧善之翰林黃松
瀑尊師儒魯山上人會集賦詩今至正辛巳晉
卿提舉儒學與張伯雨尊師高麗式上人會再
和前詩上人至京以卷示因寫往年所和重賦

一章

後先人物一時雄心迹寧須較異同來此清談散花雨
依然舊夢聽松風畫圖長共湖山在煙火頻驚殿閣空
萬里忽逢東海客前詩重寫思何窮

城外見杏花

曲江二十年前會回首芳菲似夢中老去京華度寒食
閒來野水看東風樹頭絳雪飛還白花外青天映更紅
聞說琳宮更佳絕明朝攜酒訪城東

次韻柳待制直院晚歸

庭松吐燄引凌霄露井銀牀凍不消
雲霧窗深隔風日
鳳凰聲集和簫韶書成給札分曹寫
直罷攜香滿袖飄
自昔詞臣宜白髮禮賢珍重此時招

簡王文學

有客空齋歎不歸鄉心二月亂於絲
杏花深巷春風夢
茅屋荒田夜雨詩天氣未佳宜小住
人生行樂竟何時
乞君安得千壺酒爛飲狂歌慰別離

歐陽元

試院唱和

進講金華集衆賢禮闈御命拜君前
花催蠟炬同清夜餅餤紅綾憶昔年
龍尾步隨黃閣老鵠頭書下紫微天
南宮羣彥時相問何似官街有米顛

早秋聽秋居士園池

碧池流水綠潺潺高下樓臺紫翠間
阮籍才華勝南族謝安清致滿東山
標名花塢鶯爭道集句桃符鹿守關

灑埽園丁今白髮秋翁化鶴幾時還

竹澗圖

青林翠巘俯江郊谷口湍流巨石均
戛玉萬竿鳴水樂
垂紳雙瀑盪雲旂風漪靜浸蒼龍影
月瀨光搖紫鳳巢
歌罷商巖採芝曲兩翁翰墨定神交

過洞庭

白沙隱隱見金鰲殿閣憑虛結構牢
天水渾融浮太極
神人幽顯隔秋毫龍堂深閤靈棲冷
象緯低垂客枕高

欲作廟堂迎送曲杜紅蘅碧盡離騷

夜宿寺前農家

漢南旅店已星稀倦宿田家帶落暉
蕭寺依山聊復爾鄴侯送酒是邪非
風餐并覺涼生飯露坐俄驚月在衣
老子漫遊吾漫送登山臨水澹忘歸

昌山

昌山峽口日西斜蘭渚維舟近酒家
水漱樹根龍露爪石排江岸虎交牙
路迴佛寺藏深塢風動漁舟埽落花

再拜靈均獻蘋藻月明環珮下汀沙

大明殿早朝

扶搖萬里上青霄鳳闕龍池步步瑤駝背負琛金絡索
象身備駕玉逍遙衣冠俯伏傳呼嶽千羽低回看舞韶
湖海布衣瞻盛事他時田野夢天朝

郊天禮成應制

紫壇黃幄夜無風牲璧初陳月正中瑞靄霏微成五色
神光烜赫映重瞳千官屏息瞻天表萬國關心在聖躬

清曉慶雲高捧日簫韶前導駕還宮

陳泰

偕猶溪諸公同遊青原山謁七祖塔步韻

并序

青原山七祖塔悟真寂禪師乃六祖法嗣也其塔
中舊有錫杖貝葉出塔之東為井泉者三一曰雷
湧二曰飛錫三曰虎跑清冽可愛皆七祖所開者
其初參曹溪六祖數契合石碑上具述張公無盡
信國公文山皆有詩刻於後今并錄之

夢裏青原四十年六朝來覲塔中仙傳燈有記貝書在
飛錫無聲霜井圓石壁倚雲僧入室飯鐘繁樹鵲通禪
看碑忽悟曹溪旨擬向人間息萬緣

宋本

大都雜詩

拋却漁竿滄海邊拂衣來看九重天畫闌九陌橋如月
綠影千門樹似煙南國佳人王幼玉中朝才子杜樊川
紫雲樓上如澠酒孤負東風二十年

繡錯繁華徧九衢上林詞賦漢西都朱門細婢金條脫
紫禁材官玉鹿盧萬里星辰闕上界四朝冠蓋翊皇圖
東鄰白面生紈綺笑殺揚雄卧一區

盧溝曉月墮蒼煙十二門開日色鮮海上神仙非弱水
人間平地有鈞天寶幢珠珞瞿曇寺豪竹哀絲玳瑁筵
春雨如膏三萬里盡將嵩嶽祝堯年

殿試罷賦

玉堂松檜帶晨霞遙望宸嚴共拜嘉
逢掖諸生袍立鵠

未央清問墨翻鴉扶搖九萬風斯下禮樂三千日未斜
從此君王識名姓煙波慙愧舊漁家

宋裴

都城雜咏

萬戶千門氣鬱蔥漢家城闕畫圖中九關上徹星辰界
三市橫陳錦繡叢玉盃丞相府珠幢寶刹梵王宮
遠夸縱睹爭修貢不用凋戈塞徼通

風物鮮妍飾禁城豪家戚里競留情花圍錦幄清明宴

香擁珠樓乞巧棚
叱撥馬搖金轡具
幷幪車颺繡簾旌
他年定擬持鉛槧
細數繁華紀太平

流珠聲調弄琵琶
韋曲池臺似館娃
羅袖舞低楊柳月
玉笙吹綻牡丹花
龍頭瀉酒紅雲豔
象口吹香綠霧斜
却笑西鄰蠹書客
牙籤緗帙費年華

明照坊對雨

章臺車馬去如流
白雨霏煙拂畫樓
九陌平鋪明似練
兩溝急瀉碧於油
美人虹見西山霽
少女風來北里秋

涼意滿襟簾幙卷宮鴉歸樹夕陽收

璧月

璧月悠悠上女牆六街燈市遠微茫隨車徑去柳家婢
走馬獨歸韋氏郎戚里煙塵眩銀海九重宮闕接瑤光
銅駝陌上聽鼙鼓笑殺西樓白玉觴

送高子敬歸彭城

元龍不拜富民侯袖劒囊書苦掉頭李愿有心盤谷去
阮咸無意洛中留春城寒食鶯花靜日暮鄉關汴泗流

我亦拏舟江海去試從沙鳥問黃樓

寒食暫出

一百五日上街頭半晴半雨天悠悠豪家出郭車爭道
少婦當壚人上樓輦路暗生芳草遠御溝平瞰碧波流
少年直把春償酒若箇新詩紀勝遊

通州晚晴即事

南湖相

水榭空明雨脚收凝笳催上驛亭舟紫霞爛剪翔鴻錦
碧草平鋪集翠裘落日關河初客路浮雲宮闕上神州

誰憐五色江郎筆真使超然賦遠遊

除夜宿武口驛憶誠夫兄

瓶笙楮拙澹無聊幾度他鄉遇此宵三十男兒尚書劍
尋常意氣自雲霄風燈直下漁歌亂斗柄旁邊帝闕遙
懸想銀臺門下客聽雞忙赴紫宸朝

登第詩五首

崇天門唱名

三月吉日當十三紫霧氤氳閭闔南天子龍飛坐霄漢

儒生鵲立耀冠簪黃麾仗內清風細丹鳳樓頭曉日酣
獨愛玉階階下草解將袍色染成藍

恩榮宴

上相傳宣弁冕趨玉堂西北拜鑾輿歌聲縹緲方壺外
酒味氤氲沆瀣餘慕額錦光晴爛漫帽簷花影晝扶疎
君恩誰識深如海獨倚東風詠藻魚

同年會

臨水亭臺似曲江同年人物宴華堂嬋娟笑弄龍香撥

醺醪深涵鳥羽觴醉後方言頻爾汝座中除目互平章
從來期集輸京雒仍見詩歌播八方

賜章服

自是年始幘頭花帶靴銀木簡皆具簡上仍刻御賜字金填之五月一日

皆除書
同授

承平天子重科名章服分頒出大明袍是涿羅香縷細
笏勝楷木素文橫晨趨象魏雲霞粲夕奏龍池玉雪清
遙想鳴珂朝會處鵷行爭訝被恩榮

上表謝恩

瑞日鮮明射玉題
華袍綈繅近呆愚
舍人宣贊瞻丹闕
新進趨鏘詣赤墀
黃屋雲行天杳邈
綠章風送路逶迤
湛恩豈許須臾報
要見他年獻納辭

海岸春行

越橋西下苑牆高
綠萍垂楊絳萍桃
霞擁玉樓晴啟戶
風生瑤海暮翻濤
官因立馬看花擔
漁隱聞鶯罷竹篙
惟有香園春事好
幾人詩興似吾曹

和趙魯瞻海岸冬日晚歸

白塔高標射紫霞
鳥棲宮樹客投家
燒香人拜彎弓月
穿市兒攜翦綵花
首宿地眠朝退馬
蒲萄園隔宴迴車
人生要縱長安眼
何事能容便面遮

秋思書將陵驛

斜陽催出鳳凰城
津鼓聲沉夜櫓鳴
海口風來吹酒醒
漳濱葉落喚愁生
望深夕浦蒼煙暗
夢入秋閨素月傾
況是潘郎年紀到
二毛侵鬢不須驚

雙清亭春日獨坐

帝城何處不紅塵
小海危亭獨可人
苓箬舟航浮上牖
笙歌池館接西津
恩波浴鷺連洲暖
宮樹啼鶯隔岸春
不用鞭笞了官事
笑談容得幕中賓

春暮雙清亭小酌懷張孟功

吏退公庭鴈鷺行
持杯暫對水雲鄉
山開菴畫涵晴影
花落臙脂漾晚香
酒幟隔津標柳陌
漁舟避浪向蒲塘
懷人不得同相賞
空賦停雲第二章

東岡崇恩寺晚酌其僧一峯求詩

山門杉檜碧蕭森
步屨迴廊一徑深
罷酒長風來北渚
按歌明月出東林
幽軒晚立雲容濕
高閣晴登海氣侵
忽報寒溝潮信到
可能重聽穎師琴

過餘姚寄賈治安同知

秋深持節下鑾坡
吳越風煙入浩歌
溪水通橋松作竇
山雲收雨石為窩
避泥驕馬哺寒草
過隴飢牛齧早禾
別駕歸來應笑我
驛程何事苦吟哦

送王彬叔赴西書史

廬江憲府昔曾經作掾聞君有此行
瀟皖諸山倚天峻
淮淝二水得霜清
蒼鷹自向秋風擊
丹鳳還依曉日鳴
簡牘賢勞好珍重
靈臺明處是雲程

王士熙

用袁待制送行韻

青草白沙入渺漫
層層山色舊曾看
赤城曉日霞初起
黑谷晴嵐雨未乾
錦帕蒙鞍中使馬
寶刀分膾內家盤
不才底事頻行役
只合清江把釣竿

次霍狀元接駕韻

闕頭曉日瑞光蟠
隱隱駝鈴隔薄寒
金殿巧當雙嶺合
繡旌遙指五雲看
軍裝腰裏開馳道
仙仗麒麟簇從官
詞苑恩波供染翰
秋風歲歲候鳴鑾

寄武夷思學齋

武夷山色青於水
君築高齋第幾峰
北苑鶯啼春煮茗
西風鶴語夜巢松
田家送酒芝香瀉
道士留書石髓封
聞說牙籤三萬軸
欲馮南鴈約相從

送朱真一住西山

官河新柳雪初融
仙客歸舟背楚鴻
鐵柱晝閒山似玉
石樓人靜水如空
煮茶榻畔延徐孺
燒藥爐邊覓葛洪
天上雲多白鶴去
子規何事怨東風

留別參議

祥麟不入文王囿
野鶴空盤越嶺天
荔子園深風却暑
萊公祠古竹依泉
晴霞暖映扶桑日
夜雨寒生瘴海煙
萬里相從還又別
小舟潮上更留連

別張思聖照磨

柏臺深處識風姿
南國春殘送我時
幕府日長松影瘦
琴書窗小竹香遲
山杯持酒分椰子
石蜜和漿摘荔枝
從此朱厓明月夜
飛雲頻與寄相思

白蓮

昆吾織刃刻芳菲
玉女新拋織錦機
無質易隨清露滴
有情應化素雲飛
青腰霜下蟾房冷
皓首天邊鳥使稀
最憶齊州舊遊處
日斜雙槳折花歸

送袁德平歸越

平湖如鏡靜秋波
禹穴西風卷碧蘿
狂客有船都載酒
道人無字不籠鵞
牀頭舊笏青雲近
窗下殘編白雪多
燕市塵深拂衣去
海門何處問漁蓑

送巨德新

渭城秋水汎紅蓮
白雪梁園作賦年
金馬朝回門似水
碧雞人去路如天
揚雄宅古平蕪雨
諸葛祠空老樹煙
小隊出遊春色裏
滿溪花朵正娟娟

送袁道士

五公舊譜漢庭傳之子飄飄去學仙
山裏牧羊成白石雲間騎鶴上青天
黃庭夜月迎三疊綠綺秋風度七絃
拂袖京塵留不住別離可奈落花前

軒轅雲裔越公家學道青山幾歲華
仙覓安期曾授棗詩成湘子解開花
金砂擬煉長生藥銀海初回遠使槎
二十四巖明月夜簫聲何處落煙霞

題節婦

寒窗機杼泣秋風
鏡影鉛雲不汝同
明月有光生夜白
貞松無夢妒春紅
羅襦舊繡天吳圻
綠綺離弦海鶴空
陌上行人指華表
閉門疎雨落梧桐

上京次伯庸學士韻

侍臣催講御階西
雲靜觚稜曉色低
天闕神州卑雨漢
地連碣石轉三齊
含香晝永閒青瑣
視草堂幽濕紫泥
最憶東山老松樹
秋風應有鶴來棲

長堤芳草遍灤河
誰買扁舟繫樹槎
金帳薰風生殿角

畫樓晴霧宿檐阿萬年枝上烏啼早九奏階前鳳舞多
供奉老來文采盡詩壇昨夜又投戈

送王在中代祀秦蜀山川

太華雲連蜀棧低柳花三月紫駟嘶香浮曉露金奩濕
旛拂春煙絳節齊策牘當年登桂苑詞林後夜趣芝泥
長安遊客應無數誰共王褒頌碧雞

送危伯明教授南歸

鯉魚吹浪柳花香春水還乘日計航天外青藜歸太乙

人間白髮老文昌疾風筆陳開生練細雨書壇校底囊
好為聖朝宣教鐸育才取次進明光

送張元杰

名山使者碧霞衣三月天南白鴈飛瑶席東臯分桂醕
紫檀北斗動珠輝石厓有迹尋仙去溪水無情喜客歸
上際峰前赤松宅春來蕙草正芳菲

李源道

次韻送虞伯生使蜀降香

城南尺五去天低回首彤樓十二梯六月岷山猶有雪
三春雲棧迴無泥浣花溪上看秧馬芳草渡頭聞竹雞
見說草堂遺構在公餘須到錦城西

贈劉宗道使安南

一介強於十萬兵秋風持節使清冷可容贊普窺唐壤
要遣莎車拜漢庭蜃吐瘴煙驪洞暗鯨掀巨浪海雲腥
元戎已辦安邊策萬古千秋汗簡青

送捧詔使

霜落澄江水似藍江亭折柳送驄參五條溫詔頒天北
一棹清風下斗南父老疲癯沾利澤山川勝槩入豪談
渝城好過黃花節金碧臺高酒半酣

暮春即事

垂柳陰陰雪擁沙殘陽淡淡水明霞夜來枕上初聞雨
今日枝頭不見花啼鳥已傳春去信狂蜂猶趁晚來衙
柴門盡日無人到讀罷離騷更煮茶

王思誠

壽陽道中遇雪

十月燕州冷不堪朔風如劒入衣衫
羊頭雪映鴉兒峪馬首雲連燕子巖
絕澗冰消泥滑滑斷崖土落路巉巖
昌黎奉使曾經此驛舍題詩壁上緘

晉祠用王君韻

晉溪樓閣對琳宮松栢陰森戶牖東
難老泉頭石湧雪望川亭脚谷號風
萬家稻畝棊枰上十里山村畫幅中
興廢無窮秋又老半巖霜樹晚霞紅

李仕興

抵楚門

楚門山色散煙霞人到江南識永嘉
半壠石田都種麥一冬園樹尚開花
海天日暖魚堪釣潮浦船回酒可賒
傍水人家無十室久憑舟楫作生涯

王懋德

元宵

春入東郊雪漸融熙熙天氣報年豐
萬家燈火分明月

幾處笙歌雜暖風
短髮已無丹可黑
衰顏猶有酒能紅
溪山容我閒來往
先具扁舟訪釣翁

塔布台

靈寶觀

敲鞭吟入楚雲堆
道士出迎將鶴來
門徑雨深蒼蘚合
洞房春暖碧桃開
蒲團分座臨丹竈
松釀凝香壓酒杯
相與笑談忘世慮
更從何處覓蓬萊

蘭浦漁舟

蘭浦香濤接澧湘
漁舟數葉泛滄浪
綠蓑窮笠生涯足
明月蘆花興味長
江草無情侵夢寐
煙波有分定行藏
令人還憶陶朱子
獨釣西風幾夕陽

申屠駟

金山寺

層層紺宇裏崔嵬
脚底江濤殷怒雷
塔影暗搖坤軸動
鐘聲晴擊海門開
僧臨水府洞中出
人泛仙槎海上來
六鑿塵埃俱洗盡
不知身在妙高臺

靳榮

送都元帥舒魯杰雲南開閩

飄然白髮老書生
橫槊哦詩萬里行
蠻貊望塵無敵國
朝廷賴汝作長城
巫山落葉秋風起
瀘水驚濤夕照明
若到武侯祠下拜
夢中應與細論兵

新田八景 錄三首

神陂落鴈

太子神陂護綵氛
平蕪疎樹夕陽曛
乍驚天外初來鴈

忽見沙邊已落羣
秋影橫斜浮淺水
寒聲嘹唳徹青雲
世間飛翼知多少
孰似當年繫帛勲

濟溪梅月

溪自凝寒梅自春
梅花得月更精神
波間斜浸瓊林瘦
天上高懸玉鏡新
雲霧屏開香撲面
水晶簾捲影隨人
清光醉吸歸無寐
吟就新詩夜向晨

景明飛瀑

玉龍睡起白雲堆
噴出珠璣萬顆齊
飛下半空懸瀑布

流來平地漾玻瓈
遍澆禾稼秋雲闊
靜浴扶桑曉日低
若遇春來桃夾岸
漁郎認作武陵溪

吳善

京師送玉虛宗師還山

道人野服鹿皮冠
曾約茅君駕紫鸞
天外至今風露好
人間何處水雲寬
陰陰木葉藏經榻
簌簌林花綴石壇
欲趁歸舟下吳越
凌風飛珮不勝寒

王肖翁

題趙子昂畫錢德鈞水邨圖

幽人心地本脩然此境相諳七十年
茆屋數椽依約外雲山一抹有無邊
眼前生意今林屋筆底秋風古輞川
勝景有餘描不盡歸鴻幾點落寒煙

許謙

三月十五日夜登迎華觀

夜深來此倚闌干千里樓臺俯首看
月到中天花影正露零平地草光寒
氣清更覺山川近意遠從知宇宙寬

長嘯一聲雲外落幾家兒女夢初殘

九月十七日登清涼寺翠微亭故址

梵宇崢嶸枕石頭倚風極目立荒丘黃花覆地初經雨
白鴈橫雲帶遠秋城郭已非山故在江淮失險水空流
衲僧八十仍多病收淚殷勤說故侯

春夜

飢烏驚鵲起南枝夢入槐柯覺亦悲花裏樓臺春到早
竹間窗戶月來遲篝熏翠被爐存火燈落紅星硯汙池

可惜風光半塵土明朝火急報君知

兩部蛙聲似打衙披衣清坐夜紛譁門同靖節日長閑
家近相如酒可賒低幕風生翻宿燕小簷雨歇落輕花
玉琴聲斷尋幽夢回首西牕月未斜

李惠

自題石門六觀圖卷

錄四首

甌山晴雪

天上神仙縞素裳雲間宮闕陸離光一輪日上金盤爛

千尺峰高玉筍長
飢鶴斜窺松檜影
野人獨惜蕙蘭芳
明朝黛色新如沐
添得泉珠滿石牀

雙溪春水

曲岸逶迤路不分
隔溪漁唱忽相聞
浮槎觸樹雲離影
合浦交流穀聚紋
芳草拂煙迷遠近
落花隨雨下繽紛
鷓鴣飛處春雲薄
立遍汀洲日未曛

石門夕照

北澗流泉響蟄雷
連峰中斷石崔嵬
一川紅葉青山暮

千里黃雲白鴈來
陰草含煙明翠羽
寒花和露委蒼苔
故人獨在秋江上
誰把瓊芳拂鏡埃

溪亭秋月

陰樹臨溪坐夕曛
寂然人事不相聞
嵐光濕袂渾如雨
水氣騰空半作雲
野枳垂英青鳥拾
山桑成實白猿分
中宵月在松梢頂
築石方壇禮少君

陳樵

臨花亭

滿樹琉璃間碧瑤當歸葉長映芭蕉樹頭生雨時時濕
春色如花日日消杜宇有言終不踐綠魚新種已生苗
今朝百舌聞鶯語飛上梧桐特地嬌

松邊柳下日徘徊鳥散飛紅墮酒杯芍藥成叢當戶出
茯苓分種傍松栽雲高卷雨從風去花晚將春入夏來
亭下肉紅如斗大耐看不似玉玫瑰

遠山過雨綠崔嵬竹外青松竹下梅滿樹丹青隨物換
平生富貴逐春來歌珠一串鶯流出花影數重風揭開

關右牛酥賤如土莫教紅紫落成堆

上虞魏氏湖上精舍圖

湖上蘭舟水上亭有時水漲與階平
亭前古柳經春弱
門外孤洲昨夜生海氣遙連育王塔
蜃樓半入會稽城
山陰道士攜琴至寫盡風聲到水聲

寶掌泉

屋上無端雨亂飄雨留石罅碧寥寥
浮光出穴藏丹淺
浣水為花到地消石髮年深長滿洞
玉魚春冷未生苗

泉中自是蛟龍窟頃刻陰雲滿樹腰

春日閨思

白玉堂前雙燕飛堂中思婦怨殘暉
臂環寄遠青蕪合瓊宇題乾白鴈歸
醉倚合昏驚葉暗愁尋萱蔻妒花肥
窗間昨日同心錦染罷香絲不上機

跳銀溪

枕石聽泉伏草萊跳銀溪上日徘徊
山間遠樹迎人出日轉晴虹渡水來
雲氣長連西澗石春寒猶在北枝梅

谷亭幾載秋無黍沙上菰蒲暖更栽

分題翠光亭送李仲常江陰知事

亭前練水細如縈亭上君山玉作屏林斷纔通吳月白
鴈飛不盡楚天青莓苔著雨長黏石翡翠迎風欲墮翎
怪得步兵迷望眼詩成正值酒初醒

玉雪亭

梨雲柳絮共微茫春入園林一色芳枸杞通靈空吠月
笑渠到死不禁霜夢遊蓬島瑤臺曙歌落吳雲玉樹長

亦擬廣寒親學舞朝來新製白霓裳

冰夷遊遍列仙家片片臨風散六花陰壑有光迷白月
亂山無處覓青霞臺高漸見石稜長枝重不禁梅影斜
聞說銀河都翦碎津頭幾欲問星槎

凍雲巖壑曉瞳矐目極齊州望欲空落月回光窺上界
嬌花無信誤東風曲吹鐵笛驚雲散槎向銀河與海通
野客燒丹深洞裏自調火候似春融

銀漢傾翻貫月查驚鴻無處認江沙水晶簾密秋光冷

華蓋峰高天影斜飛瀑半凝蒼玉佩薰風不度碧桃花
山前山後多鄰曲盡作江南富貴家

俗塵無路到巖扃瓊作池臺玉作亭海月寒通千頃白
楚山瘦減八分青回屏紋細裁龜甲野褐年深補鶴翎
應有才華奪天巧天葩飛墮滿中庭

羽仙飛步駕青鸞仙袂臨風響佩環琪樹移根來月裏
瓊花無夢落人間春回壟首梅先覺舟入山陰客未還
我亦玉堂揮翰手他年鵷鷺遶朝班

三泉

泉眼離離傍石稜，奔流脈脈到軒楹。
詩成石面花無數，夢冷池頭草不生。
江夏茶經有遺譜，南礪水樂變新聲。
林居漸覺機心斷，渴鹿逢人自不驚。

少微巖

石醜松寒槲葉乾，振衣又在碧霞邊。
南州處士星猶近，今歲中秋月未圓。
雲葉長黏巖上石，雨苔不滿洞中天。
麝香眠處休驚起，綠桂初紅果欲然。

丁復

鴈門送楊仲弘姪士畊歸龍泉

伯也未入玉堂日我亦忝薦金閨名三千里外嗟淪落
二十年餘異死生猶子初從鴈門見故鄉能作龍泉行
腸斷東門別小阮索詩相送若為情

題觀海圖為張普賢作

自古十洲三島勝幾時一釣六鰲連千年王母蟠桃實
五百童兒採藥船日出早看金柱湧天空只擬玉壺懸

乘查欲接張公子直到牽牛織女邊

九月一日遊昭亭

在宣州

山色江光帶近郊道旁楊柳舞寒條半生九日黃花酒
多在西風白下橋千里客遊仍暮景異鄉人事又今朝
老來未遣登臨嬾盡醉東家綠玉瓢

寄謝子木

秦贅誰徵夢午年漢宮倉氏豈淹賢荒涼秋浦時時酒
髻髻番江夜夜船湖海客身皆暮齒家山兒蕨等春拳

何時與和歸來賦白石黃沙未有田

送南臺掾史劉孟琛陪治書順昌朝賀

上帝南郊法駕親憲臣北道傳車新冰霜隨路關河曉
雨露垂天海嶽春千里渥洼從驥子九重閭闔候雞人
冕旒再拜三呼日玉帛交橫萬國賓

送僧遊廬山

廬山東南山木多石梁顛倒挂銀河仙燈夜半天人落
佛屋春深海客過五老芙蓉還好在陶公楊柳定如何

布帆又起江湖興，應道西風動薜蘿。

送萬容長老歸故山

長記題詩送萬容，喜看飛錫下諸峰。
笙吹緱嶺仍騎鶴，劍出豐城又化龍。
山氣含霜飄夕磬，溪聲和月瀉寒春。
何如官寺聽車馬，空伴黃塵起斷鐘。

次韻具菴送湛淵上人永嘉省師

早年為客曾遊處，今日題詩却送僧。
珠箔濺厓看雪瀑，寶窗緣塔見天燈。
金仙爛漫開銀界，玉女嬋娟倚翠層。

禮罷阿師窮勝討諸峯
厯厯漸攀登

送郭筦勾之西臺

南州待著騎驄馬
西土今須聽鳳皇
風安浪花清度月
秋先闕樹早驚霜
汾陽宅畔槐應老
泰華峰頭藕正香
願得盡分冰雪片
沈疴天下總令嘗

送答彥修御史調西臺

泰華雲開仙掌明
闕門樹冷早霜清
九天丹鳳銜書下
六月青驄擁轡行
南國江山吟總遍
西周人士喜爭迎

鷹鷂鵑鶚高風外
麟趾騶虞美化成

覽勝樓

二水三山帶遠洲
五臺雙闕起高秋
齊梁宮苑依城在
江漢波濤入海流
金剝曉開龍虎國
玉笙宵下鳳皇丘
一天灝氣清無際
況及此時長倚樓

與杜清碧先生

武夷山水先生宅
山上松聲落醉眠
不廢乾坤有清氣
至今巖壑出神仙
南陽諸葛吟梁父
西蜀揚雄草太玄

聖主如天明日月九重虛席正求賢

先生九曲溪邊住錦里風光太逼真當代如求董狐筆
名家政要杜陵人玉堂金馬頻催詔朱紱銀魚嬾挂身
聞道少微星不夜已知江上有垂綸

五雲絳節下林丘萬里銀槎上斗牛聖代已興周禮樂
大儒宜法魯春秋上林花霧冥冥濕太液恩波浩浩流
清夜夢回高閣遠一蓑煙雨泛漁舟

聖君虛席禮賢初太史濡毫應詔餘沙草總肥金驪褭

宮花時落玉蟾蜍晉朝人物推安石漢代文章識仲舒
成業經綸有如此人生須讀五車書

與李五峰先生

鴈蕩山前結屋牢先生欹枕聽松濤麒麟一出空祥瑞
鳳鳥孤飛惜羽毛漢代文章遷史盛晉時人物謝安高
嬾將白髮供朝紱縱有金魚換酒醪

送僧遊浙東

我家浙東海水西危峰高上起天梯蛇喉尊者秋歸洞

虎背禪師夜過溪晚日桃花山更好春風藥草路多迷
何堪相送寒江上短髮頻搔更不齊

湯公雨

初至蘇州登虎丘

擬從閭闔種胡麻虎阜山前好問家何必中秋方待月
儘教經歲可看花提筐漁婦誇鮮晚招涉舟人鬧日斜
且叩禪扉假眠息沙彌延客已烹茶

王圭

趙雲仲諸君見訪小酌次韻

長楊旖旎綠陰晴
小閣芳菲接謝城
樂事良辰真具美
酒徒詩伴舊知名
春陰忽散林光變
曉露未晞花氣清
有興時來共幽賞
暫時風雨莫寒盟

陳公輔遷居

大隱何嘗厭市閭
新遷端為好樓居
坐來疊嶂雲生麓
住近雙溪客有魚
二頃可供投轄飲
五車爭羨載行書
門前怕有西臺使
未許興公賦遂初

王璋

小閣呈兄敬叔

小閣纔容六尺船，苦寒聊與蟄俱藏。
少安書卷偏能熟，漫插瓶花已覺香。
桑火旋分蒸秫竈，松風時和煮茶湯。
閒中有事能談妙，不問維摩借道場。

薛平山諸君見訪分得扶字

荒徑經春滿綠蕪，喜聞佳客見行廚。
流鶯度曲時相喚，泛蟻盈樽不用沽。
行樂中年憐謝傳，坐曹休日笑張扶。

竹林謾詫風流事未學山王過舊壚

送梅叔章入燕

少年心力辦馳驅名德家聲世所知到闕可無梅福疏
贈人惟有宛陵詩行當塞鴈初來日歸約河魚欲上時
堂北青衫稱壽罷一杯春酒柏山詞

汪鑫

辭汪損軒憲使行姑蘇道中

潮送輕帆過別沙重重溝港響寒葭燕巢未穩元非幕

鱸膾雖肥不是家風急棹歌穿荇葉日斜橋影卧蘋花
垂虹亭下滄浪水不與愁人洗鬢華

多景樓

千里江山一覽收虛憐多景只空樓金焦對峙曹劉壘
淮陝平分楚漢溝鴈挾邊聲來北固樹連雲影識中州
向來鐵甕今何在地下孫郎亦自愁

泊瓜洲

客愁秋意渺無窮蘆葦蕭然故壘空山脈南來江欲斷

潮頭東去海相通暮雲歸鴈淮天碧斜日啼鴉楚樹紅
應是瓜洲笑飄泊十年三度落征蓬

趙知縣艮岩歲晚見訪

龍種當年舊帝家飛鳬歲晚尚天涯忽傳詩句心先識
各問流年鬢欲華村上春風喧爆竹燈簷夜雨飯胡麻
東遊故舊如相問為說桃源學種花

贄徐容齋憲使

桃源深處是吾廬半世豪華等傳車夢斷舊蕉曾有鹿

歌殘長缺信無魚
愁吟獨感庚寅賦
歸去重尋甲子書
聖代喜無封禪事
空山容得病相如

汪銖

春仲寄鄧處壺

高臺歷歷見闕河
悵悵誰憐別後多
雙鬢近從愁裏老
一春半向雨中過
溪頭殘雪黏青樹
江上微風起白波
料得湖天花事好
無由分賞欲如何

御選元詩卷四十七

謹案第十一頁後六行盡將嵩嶽祝堯年刊本嶽
訛呼據別本元詩改





總校官庶吉士臣侍朝

校對官檢討臣蕭九成

謄錄監生臣朱文佐